

PONEMENTO DI PROMER PIEDRA PA CONSTRUCCION DI EDIFICIO DI TOPCAR DEDICA NA HUBENTUD



ORANJESTAD(AAN) -- Ayeramainta a tuma lugar e ponemento di e promer piedra pa loke ta trata e construccion di un edificio nobo di Topcar.

Manera ta conoci, aña pasa durante un conferencia di prensa, señor d'Arnault a firma un acuerdo cu e companianan encarga pa cu construccion di e edificio.

Recientemente por a mira con a basha abao e edificio bieu y ayera a tuma lugar ponemento di e promer piedra.

Señor d'Arnault den su discurso a bisa: "cu e ponemento di e promer piedra pa construccion di un edificio na un manera oficial ta e simbolo di un bon comienso.

Di e manera aki nos kier demostra cu e proyecto ta uno serio y no por hala atras mas. Pa tal motibo pa nos di Nissan Topcar ta un honor pa dedica e acto aki na hubentud y muy en especial e hubentud di nos dushi Aruba.

Awe nos a pidi Axel Jourdy Ismael di apenas un aña y mey pa haci e acto oficial como simbolo di nos hubentud.

Ta asina cu nos como e mayor of grandinan tin e tarea y responsabilidad pa guia e mucha hoben aki pa e bira un

persona ehemplar den nos comunidad.

E por logra esey solamente si nos como mayor mustre e caminda pa cana. E bon y no e mal caminda.

E criatura aki te ainda ta inocente y ta depende ariba nos guia.

Si acaso esey no ta bon, e consecuencianan lo ta fatal. Nos tur ta papia di y over nos hubentud, pero no ta worde haci suficiente ainda pa nan.

Nos ta tende awendia hopi cu nos muchanan ta hopi riba caya, nan ta bebe bira burachi, usa droga esta tin cu tin Aids.

Tur esey ta hopi tristo. Esey ta bin door cu nan ta haya poco atencion of stimacion na cas? Hopi ta busca nan diversion pafor di cas. Ta di hopi importancia pa e bon desaroyo di un mucha pa e haya atencion y stimacion suficiente na cas na promer lugar.

Asina por crea un base sano di confiansa pa asina e mucha aki por cana e bon caminda. Hende grandi mester duna nan respet tambe pa asina nan por haya respet bek.

Hende grandi mester duna nan un bon ehempel tambe. Kico mas nos por haci mas pa yuda e hubentud?

Nos por participa activo den

organizacion cu ta yudando hubentud of yuda financieramente.

25 aña pasa nos a cuminsa, chikito cu un paar di hende y cliente. Nos a traha duro den temponan bon y malo unda nos como e famia di Nissan cada vez a yuda otro.

Un famia unda tin bon guia, amor, atencion y comprendimento.

Esey ta haci cu Topcar tin hopi empleado cu tin hopi aña di servicio. Asina clientenan y personal y otronan a percursa pa cu Topcar awe ta asina madura y cu e promer piedra aki den e expansion ta simbolisa un mucha.

E inversion aki den comunidad tambe tin mester di guia y amor y comprendimento di e famia di Nissan pa por crece bira un exito.

Nos hubentud mester haya e chens pa nan tin un bon futuro. Si nan worde bon prepara. Mescos cu nos di Topcar cu awe nos por ta contento y orguyoso di wak con Topcar ta crece y nos ta sigui duna e mihor servicio-na nos clientenan".

d'Arnault, den compania di su nieto Axel Jourdy y Healey a haci e acto di ponemento di e promer piedra.